



# QUÆSTIO MEDICA.

QUODLIBETARIIS DISPUTATIONIBUS,  
manè discutienda in Scholis Medicorum, die Jovis  
decimâ-nonâ Januarii.

M. NICOLAO DE JOUVANCY, Doctore  
Medico, Præsîde.

*An ad recte medendum singularis ægri natura  
potissimum spectanda?*

I.

**T**RIA sunt investiganda Medico ; morbi  
species, remedium morbi, & ægri natura.  
De morbis satis multa in Medicorum libris:  
priscorum laus est propria morbi cujusque speciem,  
causas, symptomata, tempora verissimè signasse:  
recentiorum angulos, poros, aculeos humorum  
subtilius quam utilius inquisivisse. Quoniam indi-  
vidua morbosâ curantur, non species morborum;  
ideo illæ non videntur potissimum spectandæ.

I I.

**D**E medicamentorum facultatibus, satis multa  
pariter. Si votis non respondent semper, quæ  
à probis & doctis Medicis de plantis tradita sunt;

an propter mendacium , quod non cadit in viros probos? an magis propter peculiarem locorum , ac hominum naturam? à ciniffionibus multoties decantata nusquam facta universalis Medicina, fucus & impostura. Usque adeo uni specie morbo non est unum specie remedium : ipsi nequidem pleuritidi , quæ pro variâ ægri naturâ , quandoque emeticum , quandoque sudorificum , non semper detractionem sanguinis postulat. Mineralia & metallica remedia, optima.

### I I I.

**D**E alimentorum delectu , apparatu , usu , multo plura ars culinaria præcipit , quam sapiens Medicorum disciplina : quibus tamen it obviam Hippocrates noster , quando monet suaviorem cibum salubriori anteponendum. Magno posteris exemplo , & documento , quibus notum esse vult , in stomacho non tantum , sed in omnibus corporis cavis , singularia esse in singulo homine fermenta ad quæ potissimum sit attendendum.

### I V.

**N**A T U R A singularis græcis *ιδιοσυγκρασία* , *ἀνθρώπων* , cognitu difficilis. Nullum enim animal homine vivacius , nullum animosius : & vicissim : nullum valentius , nullum infirmius : nullum inedia , frigoris , laboris , æstus patientius : nullum minus patiens. Nullum tam solitarium , nullum tam *πολιτικόν*. Ad idiosyncrasia cognitionem viam sternit.

Hippocrates quando docet oportere medentem speculari singularia & communia. Nullus es in natura singulari, si non es doctissimus in operibus naturæ communis. Naturæ communis leges ne nimium audiveris à Cartesio à Gassendæo : parum conferunt illi ad medendum. Magis ab Aristotele & Galeno : multò magis ab Hippocrate & Chymiâ verissimâ scientiâ naturali. Chymiam appello, non eam quæ tam multa effutire solet, sed eam quæ per potestates naturales ( acidum & alkali intelligo ignem & aquam Hippocrati dicta ) experimento multiplici comprobata opus aggreditur & perficit. *ἰδιοσυγκροσία αὐτοφύα* patent omni Medico, si ægrotum habeat ad interrogata respondentem vel per se vel per alios ; dummodo interroganti Medico natura communis jam diu ante responderit.

## V.

**N**A T U R A S morborum esse medicatrices edicit artis dictator perpetuus : quidni ergo ad illas potissimùm attendit qui curare satagit ? magnum est medicamentorum facultates novisse : præstantius morbi causas & speciem : præstantissimum ægri naturam omnia gubernantem & foventem. Si junctis cum illâ copiis morbum oppugnat Medicus prompta & lata victoria ; sin minus longum & fere luctuosum bellum. Illines mercurio ? sed pauciora & strictiora in ore vasa limphatica maligno per se & per medicamentum humori negabunt

exitum. Dysenteriae dabis hyppekakuana : sed imbecillus hæreditariâ labe pulmo , & delicatioris texturæ interaneæ partes emeticum respuunt , &c. Sed inquiet aliquis , hæc rara sunt , & rara non sunt artis ? artis fateor in libros conjiciendæ ; non artis in usum & salutem generis humani revocandæ. Quanquam hæc rara sunt , quia rarò videntur à non videntibus nec inquirentibus agyrtis.

*Igitur ad recte medendum singularis agri natura  
potissimum spectanda.*

Domini Doctores disputaturi.

M. Joannes Boudin.

M. Guidonus Erasmus Emmerex.

M. Michael de Hodencq.

M. Pontius Maurin.

M. Franciscus Maillard.

M. Joannes Poisson.

M. Claudius Quartier.

M. Michael de la Vigne.

M. Petrus Perreau.

Proponebat Parisiis CAROLUS BOMPART, Claromontensis,  
ex Arvernâ, Baccalaureus Medicus. A. R. S. H. 1696.

---

Apud Franciscum Muguet, Regis & Facultatis Medicinæ Typographum.